



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8 Yangia anidakangma : f Tir Yimyim

tir_yimyim

tir yimyim TAPAK 7

**Tottenham aser head coach
Thomas Frank na pilaogo**

**Asenok tezüngzüktep ka yanglutsüla, mesüra
US-i langka tesashi inaktsü: Trump**

VOL. XXIII ISSUE NO. 120 (ADOK 120) DIMAPUR YANGTEPNÜ (THURSDAY) TSÜKLAI (FEBRUARY) 12, 2026 ₹ 5.00

CM Rio HSLC & HSSLC agütsürtem moatsür

Kohima, February 11, 2026 (TYO): Chief Minister Neiphiu Rio-i HSLC aser HSSLC tatidangtem agütsütsü kaketshir ajak moaja salem osang metetdaksüogo.

"Nenoki tatidang agütsütsü renemba ajanga takok angutsü imlar" ta CM Rio-i ashi.

Paisa Nagaland Board of School Education dang tatidangtem tiptema agitsü moatsüogo.

Asüng, February 12, 2026 nungi Higher Secondary

School Leaving Certificate (HSSLC) tatidang tenzüksü aser March 9, 2026 nü tembangtsü.

Nagaland kübok examination centers 68 nung streams asem nungi kaketshir 16,095-i HSSLC tatidang agütsütsü.

Maneni, February 13, 2026 nungi High School Leaving Certificate (HSLC) tatidang tenzüksü.

State ajungalen examination centers 98 nung kaketshir 23,505-i tatidang agütsütsü.

Nagaland Congress-i Assam CM aitsür

Dimapur, February 11, 2026 (TYO): Assam Chief Minister Himanta Sarma-i election campaign mapang Assam Congress MP Gaurav Gogoi mezüngmeshia aser tenüng menükja jembiba aitsür ta Nagaland Congress-i metetdaksü.

"Sorkar ketdangsübaren ya ozüngi melaba telatetba kübok dang alitsüla. Assam Chief Minister-i election guidelines sülen anidaksüla aser o tamajung jembiba anentsüla" ta Nagaland Pradesh Congress Committee president Apok Jamir-i Congress Bhavan, Dimapur nung osangbener den jembidang ashi.

Assam assembly elections kobi melii agitsü aser Chief Minister Sarma-i minority communities dak tenük yoka telemsa adoktsü onüktem

jembiba ya yimya tamajung ka tenteta yutsüba lir ta Apok Jamir-isa metetdaksüogo.

Iba yimya tamajung yagi Nagaland aser Assam nung dang masü saka north east ajungalen kongshir ta paisa shisem.

"North east renloksü atema telongjem aser teputep nüngdaker aser Assam Congress-i election atema noktakba pusema nungiter. Election nung terenlok aser north east lokti asoshi temulung agüja inyaksüla" ta Apok Jamir-isa metetdaksü.

Sensotemi ibala telemsa adoktsüba inyaksangshi anema noktaksüla, aji ta mesüra north east nung tia tamajung ajurutsü. Nübertemi pei nüjiso kümzüka ayutsüla aser BJP sorkari telemsa adokba policies inyakba anema raratsü mepishir ta paisa ashi.

NPYF-i ozüngi memelaba 'toll gates' shibangtsü akhanger

Dimapur, February 11, 2026 (TYO): Sorkari tenokdangba agüja liaka Town Councils talisa Dimapur Municipal Council (DMC) aser East Dimapur Town Council (EDTC)-i ozüngi memelaba toll gates lapokba aser temelaba melii taxes meshiba aitsür ta National People's Youth Front (NPYF)-i metetdaksüogo.

Nagaland sorkari Home Department ajanga May 19, 2022 nü tenokdangba agüja liaka Purana Bazar, Kevijau Thaheku, Burma camp area amala tesemtem nung toll gates lapoker garitem nungi tax meshiba osangtem angazüker ta NPP (National People's Party) nung Youth Wing NPYF-i sangdong ka nung ashi.

Ozüng alema lapoka aliba toll gates nung "utility fees" ta ser rickshaws atema Rs. 50 aser truck tulutem atema Rs. 250 meshir ta parnokisa ashi.

Municipal Affairs Department-i September 2025 nunga tenokdangba aliba ajanga

toll tax sarutsü memelar ta metetdaksüogo. Anungji item toll gates lapokba ya ozüng alema lir ta NPYF-isa metetdaksüogo.

Maneni, item toll gates nung Goods and Services Tax (GST) kübok dena aliba goods asoshi tax tanaben meshia agir. Anungji item "utility fees" ta kechi nung amshir osang tejangja metetdaksütsüla ta parnokisa takhangba agütsü.

District Administration aser Home Department-i DMC aser EDTC kübok ozüng alema lapoka aliba toll gates tangsa shibangtsütsüla aser ozüngi memelaba mapa inyaktertem anema ken o benoka angadangtsüla ta parnokisa takhangba agütsü.

Nagaland nung sensotem aser shishilembar timtemdaksürtem anema ola adoktsü aser bangdakpur dang tekaratiba nung sorkar tetuyubatem inyaktsü ayongzüker ta Media Cell, NPYF-isa sangdong nung metetdaksü.

ANATG-2015 tesayurtemi mapang telatet makai lumia lungkak aiter



Kohima, February 11, 2026 (TYO): Sorkari mapang atsülangba atema tejashi nung ANATG-2015 Batch tesayurtemi Bodbar nungi mapang telatet makai lumia lungkak ait tenzükogo.

All Nagaland Adhoc Teachers Group (ANATG)-2015 tesayurtemi tanü agi anogo tenetbuba lungkak aitogo. Parnoki February 4, 2026 nungi Naga Solidarity Park nung adenshir timi dang lungkak aityonga aru.

Parnoki lungkak aitba mapang Nagaland sorkari All Nagaland Adhoc Teachers Group of 2015 (ANATG-2015) indang regularization maparen inyaka

aruba osang lemsatepa liasü.

ANATG-2015 batch nung School Education Department kübok 1990s tatemlen aser 2012 tashi contract/ad-hoc basis nung shimokba tesayurtem dena lir ta sorkari yashi sangdong ka nung metetdakja liasü.

District administration-i Secretariat Junction kübok Capital Convention Centre kima nung anepdang 9:00 nungi nikongdang 4:00 ako tashi dang lungkak aittsü temelaba agütsüogo saka ANATG volunteers-i Civil Secretariat tesülen süki enokogo aser parnoki akhangba ama telangzüba mangu tashi lumitsü metetdaksüogo.

Tanü anüngdang 12:00 ako nungi Capital Convention Centre, Kohima kima nung tebur volunteer 15-i lumitsü tenzükogo.

Lumia lungkak aitertemi parnoki akokba tashi shilem agitsü aser 2018 o 2022 ama masü tanbo temelenzükertem malitsü ta ANATG-i ashi.

Lumia lungkak aitertemi tzi ajemba dak alaka juice supplements kecha majemtsü ta parnokisa ashi.

Züngsem 1,166 pronglai suitability test aser tanga nüngdakba maparen ajak ajangogo aser onok regularize asütsübaji tim aser ozüngi melar ta ANATG ketdangpurtemi ashir.

MoDONER-i Jan 2026 nung Nagaland nem sen aika agütsüogo

Dimapur, February 11, 2026 (TYO): Ministry of Development of North Eastern Region North Eastern Council Secretariat, Shillong-i February 10, 2026 nü Nagaland nung January 2026 atema status report metetdaksüogo.

January 4, 2026 nü National Institute of Technology (NIT), Nagaland nung Ashtalakshmi Darshan Youth Exchange Programme indang 4th Batch tenzüker aser iba nung linük kübok tesem balala nungi kaketshirtem adenshia shilem agiogo ta MoDONER report nung shia lir.

Iba sentong nung NIT Nagaland Registrar Dr. Manoj E. Prabhakar, Executive Engineer (Power), NEC Ibanri J. Kharshiing aser NIT, Nagaland ketdangsürtem aden.

Ashtalakshmi Darshan Youth Exchange Programme nung Punjab nungi kaketshir 19 aser Union Territory of Daman & Diu and Dadra & Nagar Haveli nungi kaketshir 20 aden ta parnokisa ashi.

Sentong nung Ibanri J. Kharshiing-i youth exchange maparen indang lemsatepdang iba sentong ya national integration atema tongtipang sabang ka lir ta ashi.

Ashtalakshmi Darshan programme ajanga India kübok tesem balala tsüngda aputem latsür aser youth engagement o cultural exchange ajanga linük longjemba akangshidaksür.

Nagaland nem Rs. 5,71,73,750 agütsü:

North Eastern Council (NEC)-i Nagaland state nem Rs. 5,71,73,750 lezmüksüogo.

Iba ya Jalukie, Peren District nung Community Trade Link Centre (CLTC) Project, Kohima nung Working Women Hostel yanglutsüba, Jalukie nung Capacity Building & Developing Infrastructure for Off-road Tourism, Bamboo Incense aser Tooth Pick Manufacturing Unit lapoktsüba aser Government Polytechnic Seithekema-C, Chumoukedima nung Classroom aser 40 bedded Boys Hostel

yanglutsü atema lir ta report nung shia lir.

NESIDS (Roads) kübok Nagaland nem Rs. 5.61 crore agütsü:

NESIDS (Roads) kübok Nagaland nem Rs. 5.61 crore agütsüogo aser iba ya Jalukie (NH-129A) nungi New DC Complex model township Peren tashi lenmang yanglutsüba lir.

Iba mapa ajanga nütsüng yongsük 18000 aser yimtsüng 5 ajangzüksü ta NEC-i ashi.

January, 2026 nung NE States & Regional & Other Agencies nem sen lezmüksüba:

NEC-i January 2026 nung Northeastern State tem aser ano North Eastern Region nung regional aser tanga agencies nem Rs. 81,50,78,461 agütsüogo.

Iba ajanga NEC-i North East nung infrastructure development, livelihood enhancement, cultural promotion, research aser innovation atema temulung agütsüba sayur ta report nungsa shia lir.

Dimapur nung PM-NAPS indang awareness sentong agi



Dimapur, Tsüklai/February 11 (TYO): Prime Minister National Apprenticeship Promotion Scheme (PM-NAPS) indang awareness aser outreach workshop ka Ministry of Skill Development & Entrepreneurship (MSDE), Government of India kübok Regional Directorate of Skill Development & Entrepreneurship (RDSDE), Assam ajanga Construction Skill Development Council of India (CSDCI) den lungjemer February 11, 2026 nü Hotel Europa Inn, Dimapur nung ayongzüka liasü.

Vocational training institutions aser industry establishments tsünga tesendaktep tashi itshtisü nükjidong nung iba workshop ya ayongzüka liasü.

Iba sentong nung Government ITI Dimapur nungi trainees aser instructors, Directorate of Employment, Skill Development & Entrepreneurship (DoESDE), NSDC, MSME Tool Room nungi ketdangsürtem aser sorkar departments aser private

industry establishments balala nungi tongtipang nisungtem densema nisung 100 dak tema dena liasü.

MSDE ecosystem aser sector skill bodies nungi shisalen sayur temi PM-NAPS indang technical aser awareness session agia employer incentives, stipend support, online registration process, contract generation, compliance requirements aser apprentices tajangzüka indang angatetdaksü.

Apprenticeship ajanga industries temi skilled workforce yangerdaksür aser kasa mapang lanurtem hands-on industry exposure aser nationally recognized certification nung yarir.

North Eastern Region atema special intervention iba workshop nung sangdong, aser iba kübok region nung apprentices tem apprenticeship training North East telungzüka mesüra danga nung agir aser iba mapang PM-NAPS kübok Direct Benefit Transfer (DBT) ajanga teyari sen 3,000 agütsür.

Workshop nung shisalen sayur ya Alongse Sangtam, Joint

Director, Directorate of Employment, Skill Development and Entrepreneurship, Govt. of Nagaland; Rohan R. Patil, Deputy Director, RDSDE Assam; Pravin Bhaskar Yadav, SEC-Nagaland, National Skill Development Corporation (NSDC); Pinaki Sankar Deb, Sr. Manager, Construction Skill Development Council of India (CSDCI) aser Netenba Ajem, Principal, Govt. women ITI, Chumoukedima nung liasü.

Iba sentong nung Kamaiah Engineering Services Pvt. Ltd., Guwahati ajanga Directorate of Employment, Skill Development & Entrepreneurship, Government of Nagaland den Memorandum of Understanding (MoU) ka zülutep, koba ajanga state ajunga nung Pradhan Mantri National Apprenticeship Mela (PMNAM) maparen yaria inyaksü.

Iba sentong nung shilem ka ama küm shia district balala nung PMNAMs pezü ayongzüka lanurtem apprenticeship aser employment opportunities den sendaktepdaksütsü.

Tuensang nung PM Vishwakarma workshop ayongzüka

Dimapur, Tsüklai/February 11 (TYO): Ministry of Micro, Small and Medium Enterprises (MSME) Government of India aser MSME Development and Facilitation Office, Dimapur ajanga Department of Industries & Commerce and District Industries Centre (DIC), Tuensang den lungjemer PM Vishwakarma kübok awareness workshop ka February 11, 2026 nü DRDA Conference Hall, Tuensang nung ayongzüka liasü.

Sentong nung Inspector DIC Tuensang, Thungdi Chang-i aluyimer dang Ministry of MSME kübok credit schemes aser State sorkar indang scheme balala indang metetdaksa liasü.

Pai aluyimer tem dang osang agiteptsü aser DIC Tuensang nungi teyari meshitsü ajungshia

liasü. PM Vishwakarma ya linük tesem ajunga nung tradition artisans aser craft men asendenshia tashi agütsütsü nükjidong nung tenzüka Central Sector Schemes lir, ta pai ashi.

Iba scheme yagi Carpentry, Basket Weaving aser Blacksmith ama traditional trade 18 nung inyaker yaritsü meranger, koba India indang sobaliba nung tera yanga lir.

Sentong nung Khumchopi Sangtam, Functional Manager, DIC Tuensang ajanga pela agizükba o jembia liasü. Auching Sonla, Area Coordinator, NSRLM-i anir sensaksemba sentong agia liasü aser SBI Tuensang nungi Tovito, Field Officer-i PM Vishwakarma kübok loan component indang lemsatapa liasü.

Süshi Tongpang aser Yimjung Apular ta asüba kakat ana sayaogo



Guru A. Mar Jamir-i (achichi nungi anabubaba) züluba kakat ana Süshi Tongpang aser Yimjung Apular sayar kelen Wb. Marsanen Imsong (achichi nungi mezüngbuba) (abelen nungi anabubaba) Wb. I Temjen Tzüdir aser Wb. Imtipokyim (abelen nungi mezüngbuba) nunger külemi tangokba noksa .

Mokokchung, Tsüklai/February 11(TYO) : Tanü Ao Riju Conference Hall nung Guru A. Mar Jamir-i züluba kakat ana "Süshi Tongpang" aser "Yimjung Apular" sayaogo.

Süshi Tongpangta asüba kakat Ao Senden Tir Wb. Marsanen Imsong-i sayatsür kelen mapa tatsüka agia jembidang Ao kin rongnungi Ao oshi nung kakat zülur aika maliba mapang ka nung Guru A. Mar Jamir-i kakat ana tashi zülua adoktetbaji Ao kin asoshi temoatsü tulu lir ta kakat zülur nem tenüngsang agüja ashi.

Kakat ka zülua adoktsüji mapa kanga temela masü, kakat züluba mapang nung kakat zülur jagi tazüngertem iba kakatji ajanga temoatsü ngudaksütsü asoshi timtem jenti agia zülur, anungji kakat nung zülua adokba nung aibelen aliba asoshi jaoka merenshitepba aser sencha achiba yimya ya mebenshitsu, saka timi kakat zülur den angatettepa metongshitsütsüla nungtaker ta Ao senden Tir-isa

ayongzüka jembia.

Ao Senden Tongti Zülur Wb. Imtipokyim-ia kasa sentong nungsa Yimjung Apularta asüba kakat sayatsü, aser pa iba kakat azüngba ajanga tazüngertem mulungjang yimjung aiddakja alima nung aser nüburtem tsüngda yimjung alitsü ta tamang akar ta ashi

Kasa sentong nung Padmashree Sangyusang Pongen-ia tepela o jembia aser iba sentong Wb. I. Temjen Tzüdir Ao Riju Publication Head & Coordinator ketdangsüba nung agia liasü.

Kakat zülur Guru A. Mar Jamirya Ungma nung arishi küm 71 tain aser pa ya literature nung Guru ngutetba lir. Pai züluba kakattemji Tar Shilu, Tiar Akhüm, Süshi Tongpang aser Yimjung Apular ta lir.

Süshi Tongpang ta asüba kakat ya sen jenjang 200 aser Yimjung Apular ya sen jenjang 180 lir aser item kakattem ya taginürtemi Ao Riju office nung angutsü.

Mkg nung Asian continental chiyungtsü angudak restaurant ka lapokogo



MMC councillor Wapang Kichui the Social Garden restaurant lapoktsur kulen restaurant kibur aser sentong nung tongti shilem agirtem den tangokba noksa nung angur.

Mokokchung, 11th Feb (TYO): 'The Social Garden' ta sür Mokokchung nung restaurant tasen ka February 11 nü MMC Councillor, Wapang Kichu-i lapoktsüogo. Kumlong Baptist Arogo Assoc. Pastor (Youth), Imnakumzuk Jamir-i iba restaurant meshitetsü.

Iba ya Imkongmeren Sports Complex, Mokokchung Multi-purpose Indoor Stadium-i aoba lenjem nung angutsü. Iba restaurant ya lanur Sb. Chiben Jamir, shiba civil engineering zünger tang Delhi nung coaching tagidak lir aser pa medemtsür Kr. Ongjena shiba Interior Designer ka lir, tena senteper lapokba lir.

Iba restaurant nung ya Asian continental chiyungtsü tapu balala angutsü. Sorochoiker tongtiji tangalen nungi anir aru. Yangi kilung nung dang masü saka kima dena kazütettsüsa kanga junga yanglua lir aser jangratemtsükaji private lounge taktang dena lir. Meilongi ano

facility balala inoksema aotsü tebilemba lir ta shiogo.

Tanü joko sorkar mapa inyaksü maongka apara, saka asenoki dang inyakdi sürbo tanga teinyaksü mapa aika lir, ta restaurant kibur Kr. Ongjena-i iba osangbener den jembidang ashi. Lai la sasa teka ia inyakba mapa ka inyaksü jangra liasü aser lar medemertema tangalen iba ama pei sasa mapa meranga inyaker aser takok ngua inyakertema lir. Aji oda, Mokokchung nunga chiyungtsü tajung angudak tesem tajung ka nüngdakba ajiteta iba mapatong ya medemer Chiben Jamir tena senteper tenzüko, ta lai metetdaksü. Iba restaurant nung ki narö (interior design) ajakji Ongjena teka ia yangluba lir.

Councillor Wapang Kichu-i iba restaurant lapokja mapang tatsüka agidang, Mokokchung ya town tila ka dang, anungji, asenok sasa mapa yangerteta ao nung dang asenok litettsü.

Iba restaurant ya tesem tajung ka nung amenokogo aser ibai Mokokchung nungbo balaka asütsü, ta ashi.

Yimya agi business nungji teti kasa dangbo masür, anungji, tensa tia balala ajurudang tezü metangi meranga inyaksü, pai ajungshi. Mezüng lapokba mapang nung dang masü saka teti chiyungtsü tajungtiba anganütsü merangang, ta paisa shisem.

Iba restaurant nung khen nung nisung 50-55 mentettsü. Hombar nungi Honibar tashi anepdang 11:00 nungi aonung 9:00 ako tashi iba restaurant lapoktsü aser tajung kaji delivery service-a agütsütsü, nüngdakbapuri private event aser social gathering asoshia amshitetsü. Iba mobile number – 9774031851 ajanga osang tejangja agitettsü mesüra parnok meyong instagram "thesocialgarden" ajanga tongteprateptettsü.

ADC Peren-i senzusemponger dang tekumdangtsü metetdaksür

Dimapur, Tsüklai/February 11 (TYO): Kipeujang nungi Peren Headquarters tashi bituminous surfacing mapa inyakba mechi Additional Deputy Commissioner, Peren, D. Robin, NCS-i Peren Namdi nungi Peren Government College ajanga Peren Headquarter leni aoba lenmang nung February 11 nungi 17,

2026 tashi gari kata mesenzüdaksütsü, ta sangdong ka ajanga ashi.

Additional Deputy Commissioner-i iba lenmang nung senzusemponger ajanga dang iba lenmang melen Old Chalkot Junction nungi New Peren Village ajanga Peren Headquarter leni aotsü metetdaksü.



February 11, 2026 nü New Delhi nung abelen nungi- Dr. (Prof.) A K Bhalla, Dr. Jayashree Sood, Dr. Ajay Swaroop, Dr. Ajay Sharma aser Dr. Vipin Tyagi nungeri osangbenertem den jembidang tangokba noksa nung angur. Meta talang nungi robotic telesurgery aika takok ngua agitetba ajanga Sir Ganga Ram Hospital-i Indian healthcare nung alizüng tasen ka tongtetogo. Mizzo Endo 4000 robotic surgical system amshia Vapi, Gujarat nungi doctor temi meta talang nung aliba Sir Ganga Ram Hospital nung surgery aika takok ngua agitetogo.

SC-i Air India tayimtsü tsükokba bushisüngdangba osang meshir

New Delhi, February 11 (Agencies): Bodhbarnü Supreme Court-i Centre sorkar dang yaküm June 12 nü Ahmedabad nung Air India tayimtsü tsükokba sülen tang tashi nung bushisüngdangba dak sendakba inyakyim report agüjang, ta tuyu.

Centre sorkari Supreme Court dang, Aircraft Accident Investigation Board (AAIB)-i iba tatalokba bushisüngdangba maparen tatembanglen kati arudar ta metetdakja liasü.

Air India indang Boeing 787-tayimtsü AI171 ya Ahmedabad nungi London nung aliba Gatwick airport-i apusoba sülen mapang tatsüka tsüngda tsükokka liasü.

Iba tayimtsü nung pilot-in-command ji Captain Sumeet Sabharwal aser co-pilot ji Captain Clive Kunder na liasü. Iba lendong nung passenger 241 densema nisung 260 asü.

Bodhbarnü Chief Justice Surya Kant aser Justice Joymalya Bagchi nati akümba bench-i iba ken o angadangba mapang nung Centre aser

Directorate General of Civil Aviation (DGCA) na tenüng nung jembir Solicitor General, Tushar Mehta-i court dang, AAIB-i iba tatalokba bushisüngdangba tatembanglen kati arudar aser shilem karbo bendang linüktem nung bushisüngdangtsü nüngdaker, ta metetdakja liasü.

Tamasabo bench-i, AAIB-i bushisüngdangba report ji 'sealed cover' ka nung agütsütsüla, ta metetdakja liasü. Ajioda Solicitor General Mehta-i bench dang, iba bushisüngdangba report tejangaji nenok den lemsateptsü, ta metetdaksü.

NGO Safety Matters Foundation tenüng nung jembir, lawyer Prashant Bhushan-i, Boeing 787s tayimtsü asem-a kasa yimya nung tsükokogo, ajisüaka Centre sorkari item temepishiba ken o dak sendakba nung telangzüba kecha magütsü, ta metetdaksü.

Bhushan-isa, pilot 8,000 dak temai Boeing 787 tayimtsü ya majung, anungji joko mamshitsüla ta ashir, ta metetdaksü.

Paisa, AAIB bushisüngdangba team nungji züngsem pongubo DGCA nungi lir, ta ashi.

Iba sülen bench-i Centre sorkar dang Air India tayimtsü tsükokba bushisüngdangba inyakyimji court nem metetdakjang, ta tuyu.

CJI-i, "Asenoki AAIB-i bushisüngdangba report ji atadi, iba sülen court-i bushisüngdangtsü nüngdak asü masüar telemetba agitsü," ta metetdaksü.

Iba ken o ya maneni hopta asem sülen angadangtsü.

Yaküm November 13 nü Supreme Court-i, tayimtsü tsükokba bushisüngdangba report nung AAIB-i asür pilot Captain Sabharwal aija mali, ta metetdakja liasü.

Yaküm iba lendong nung asürtem (tayimtsü nung alirtem) 241 nungi parnok 169 India nunger liasü, British nunger 52, Portugal nunger tenet, Canada nunger ka aser crew members 12 liasü. Iba lendong nung Vishwashkumar Ramesh dang kümzüka liasü.

UP nung kiya mozü chidaktsüba sülen tanur aika hospital-i anir ao

New Delhi, February 11 (Agencies): Uttar Pradesh state kübok Farrukhabad aser Mainpuri district na nung aliba school tem nung tanurtem nem kiya mozü chidaktsüba sülen tanur 120 dak tali shiranga hospital-i anir ao, ta Bodhbarnü ketdangsertemi metetdaksü.

Tanurtem nem kiya mozü 'Albendazole' süngjang chidaktsüba sülen tanur aika tekolak menüa aser saaktsüa liasü.

Mongolbarnü Farrukhabad kübok Rathora Mohaddinpur yimdak aliba Jawahar Lal Prema Devi School nung tanur 150 nem iba mozü chidaktsü,

iba sülen tanur 100 shi temang nung timtem adokba ajanga tesayurtem aser tsüraburtem kanga aoksatepa liasü.

Iba school nungjagi kaketshir 33 Kamalganj nung aliba Community Health Centre-i anir ao aser kaketshir 67 district headquarters nung aliba Lohia Hospital-i anir ao.

District Magistrate Ashutosh Kumar Dwivedi-i Lohia Hospital semdangba sülen doctor tem dang akokba tashi tanurtemji tajungtiba nung anepalutsü tuyua liasü.

Chief Medical Officer Dr Avanindra Kumar-i, Mongolbarnü 'deworming campaign' ya district nung aliba school ajak nung agia liasü, ta metetdaksü.

Mainpuri district kübok Nagla Keeratpur nung aliba sorkar school ka nunga tanurtem nem kiya mozü chidaktsüba sülen tanur 20 dak tali shirangadok.

Chief Medical Officer, Dr R C Gupta-i, tanur aika shiranga hospital-i anir ao aser

parnok teimbaka pei kidangi meyipa yokogo, ta metetdaksü.

National Deworming Day ya küm shia February 10 aser August 10 anogotem nung amonger, aser iba anogomong nung arrshi küm 2 nungi 19 tsüngdapur tanurtem nem kiya mozü chidaktsür.

Iba tatalokba dak sendakba state nung opposition Samajwadi Party-i, iba tensa ya ajanga state nung "medical emergency" aliba sayur, ta metetdaksü.

Samajwadi Party-isa, state nung taila mozü agütsür, ta aitsü.

Ano külen Aam Aadmi Party-ia, iba ya zübazülema inyakba agi lir, anungji aibelenertem nem temerenshi agütsütsüla, ta takhangba agütsü.

Akhil Bharatiya Vidyarthi Parishad (ABVP)-ia sorkar dang tiyongtsüi aita inyaktsüla, kechiyong mozü 'expire' mesüra tamajung amshiteper, ta metetdaksü.

Jan Gana Mana ken jakdang Vande Mataram tama atentsüla: MHA

New Delhi, February 11 (Agencies): Ministry of Home Affairs (MHA)-i, linük ken 'Vande Mataram' aser linük naklu ken 'Jana Gana Mana' na külemi atenba mapang nung linük ken Vande Mataram nung tekong trok ya tama atentsüla, ta metetdaksü.

Tawa MHA-i, Tir arudang, linük wako saladang aser Anghtemi jembiba official sentongtem nung linük ken Vande Mataram ya minute asem ser second 10 atentsü, ta metetdaksü.

"Linük ken aser linük naklu ken külemi atendang mesüra atemdang linük ken ya tama atentsüla, mesüra atemtsüla," ta Ministry-i metetdaksü.

Ministry-isa, "Linük ken atendang mesüra atemdang

sentong nung adenertemi nokdaksüla. Ajisüaka newsreel mesüra documentary nung linük ken atemdang tereprangertemi menokdangyonga kecha masü, kechiyong ibaji ajanga film tesayadak jangjongtsü aser ratamatateptsü," ta metetdaksü.

Ano school tem nunga linük ken tama atemtsüla, ta ministry-i metetdaksü.

Linük ken Vande Mataram küm 150 ajungba Centre sorkari amonger.

"School ketdangsertemi sentong balala nung linük ken aser linük naklu ken atentsü atema kaketshirtem ajungshitsüla aser linük wako a k h ü m t s ü b u b a ajungkettsütsüla," ta Ministry of Home Affairs-isa metetdaksü.

Global Top 250 Hospitals nung AIIMS jenjang 6buba nung lir

New Delhi, Tsüklai/February 11 (Agencies): India nunger All India Institute of Medical Sciences (AIIMS) ya 2026 Brand Finance Global Top 250 Hospitals nung jenjang 6buba nung lir, ta osang ka ajanga metetdaksü.

Iba rankings nung India nunger AIIMS dang tajungba hospital ponguji Johns Hopkins Medicine, Oxford University Hospitals NHS Foundation Trust, Stanford University Medical Center, Mass General Brigham aser Mayo Clinic lir. Item hospital ya US aser UK nung lir.

Iba rankings nung AIIMS-i research aser scientific output

nung score 79.4 angu aser care delivery nung score 76.1 angu.

Brand Finance Global report ajanga ashiba agi, AIIMS ya alima nung kanga nüngtugu hospital tem rongnung densema lir aser AIIMS ajanga maneni nüburttemnem quality healthcare agütsüteter, talisa low & middle income linüktem rongnung iba hospital ya temaba jenjang nung lir.

AIIMS Director, Prof M. Srinivas-i, alimai iba reju (AIIMS) meteta tushiba ya ajanga AIIMS-i maneni shirangertem tiyongtsü südaktsür kanga nendaka inyakba kuli sayur, ta metetdaksü.

France tir Emmanuel Macron-i India semdangtsü



New Delhi, Tsüklai/February 11 (Agencies): Ato Kilonser Narendra Modi-i jaokba sülen France tir Emmanuel Macron-i February 17 nungi 19 tashi India semdangtsü, ta Ministry of External Affairs-i metetdaksü.

Anogo asem India semdangba mapang PM Modi aser Macron na ajuruteptsü aser Horizon 2047 Roadmap kübok India aser France na tesendaktep akangshitsü asoshi ken o balala benoka sensak asemtsü.

Lenir ana yagi ano regional aser international terenlok dak sendakba nung pei tebilemba lemsateptsü, kong Indo-Pacific region nung tesendaktep densema lir, ta MEA-isa metetdaksü.

India semdangba mapang Macron aser PM Modi na Mumbai-i oa India-France Year

of Innovation sentong tenzüksütsü, koba 2026 küm tepeyong linük anaprongla nung benoka inyaktsüba sentong ka lir. Innovation, technology aser bushisüngdang nung longjemer inyakba jenjang ajungkettsü nükjidong nung iba sentong ya amenoktsü lir.

February 19 nü France tir ya New Delhi nung AI Impact Summit nung adentsü aser iba ajanga linük anaprongla nung artificial intelligence aser technology tasen renloka aoba sayutsü.

PM Modi-i 2025 küm February ita France semdangba sülen Macron-i India semdangtsü lir aser iba ajanga linük ana tsüngda bilateral tesendaktep atsülanga aoba sayur.

India aser France na defence, space, civil nuclear energy, maritime security, counter-terrorism aser climate action dak sendakba nung longjemer inyaka arudar. Toba küm France semdangba mapang linük ana yagi advanced aser modular nuclear reactors tilatem dak sendakba nung longjemer inyaktsü mulungtepogo.

ALI TAYOKTSU LIR

XELHOZHE nung Aoyim den sentakteba aliba Ali 4 Pura dak tema lir.

Tasazük Mashii angutsü.

94360 02285

Rs. 250 per sq.ft

Contact : 9436404186 /

9612897620



TIR YIMYIM YIMOBILEM (EDITRIAL)

DIMAPUR THURSDAY, FEBRUARY (TSÜKLAI) 12, 2026

Nija school tem azüoktsüla

- P Tiamongba Aier

St. Mary's Higher Secondary School, Padampukri nung azüంగా class 10 aser 11 kaketshirtem dang Nagaland Board of School Education-i ketdangsüa agiba HSLC aser HSSLC tatidangtem indang admit card atema sen meshiba osang angashia kanga aoksaogo. February 12, 2026 nungi tenzüka agitsüba tatidangtem atema NBSE-i February 10, 2026 nü Class 10 (HSLC) aser Class 12 (HSSLC) admit cards agütsüba metetdakja liasü aser kasa anogo nung iba osang angashidang kaketshirtem asoshi kanga aria bilemstsüogo. Global Window Director aser tasütait osangbener Wb. Süngküm Aier-i St. Mary's Hr. Sec. School, Padampukri indang osang sangdongba nung school principal-i yaküm December ita sangdong ka nung Model Test nung tamakok anguba kaketshir shiai Rs. 5000 agütsü nung dang admit cards angutsü ta tetuyuba ka agütsüba shiogo. Ita ka ser tali jakdang iba tetuyuba agütsü süra kaketshir tsüraburtem kechi repranga liasü asü tanurtemi iba osang pei pei tsürabur dang meshii miimbanga ayu? ta rataa osang angaogo. Admit card menügzüksü atema sen tenem mesüra noklang ka meshiba süra ibajibo kecha masü odang toktsüdi, saka sen meyirjang pungu meshibaji English nung 'daylight robbery' ta ashiba amato lir. Kodaser tsüraburtem aser kaketshirtemi mapang shitak nung ola madok, kodaser school ketdangsürtem parnok sünütsü südaktsür? ta jashia iba osang angaogo. Küna nisung kari tasü itta ola adokba aser osang sangoktsüba ajanga St. Mary's Hr. Sec. School, Padampukri nung tim masüba aser tashiyim mapa jungkai adoka yimjak nung prokshiogo aser iba ajanga tatem nungbo kaketshir ajak nem admit card angati dang lema agütsüogo. Saka iba tatalokba nung tsüraburtemi yaser atema lesson tajung ka agitsü nüngdaker ama ajiteter. Nagaland nung nija school onsara kümogo aser kinük kisanj ajak nung school lapoka lir aser lapokdar. Haoko school lapoker kariibo chichiba tesayuba agüja tanur anitetsü nükjidong nung lapoker bendanga agüja sayur saka ano aikati business tajung ka bilema lapoker aser takar akümtsü meranger. Iba jagi tsürabur aika nija school ketdangsübaren nung temulung masüba aser mepelaba nemnemtepbabo angashir saka yimjak nung tuteta jembiba mesüra mapa inyakbabo mangur. Hao school lapoka, tesayurtem aser mapa inyaker nem itasen agüja aotsüba asoshi sen nüngdaker aser sen arulenji bushitsüji tim dang. Admission fee, monthly fee mesüra exam fee amala agiba ajanga dang school senpongi sen aita school ji taküm lia ketdangsüa aoer. Ajisüaka, tanü nija school aika nung pei sünütsü dang süa fee atuba mesüra sen saruba mesüra shishilembaba osangtem angazüker aser tenük agi angur. Tatishitsü agi, tesüiba mapang amato masü saka tanübo school-i dang uniform aser süoshi ayoker, kaket ayoker aser jenjangji tanga den medemdangra onsara tur ayokba kulitem lir. NBSE-i Nagaland nung sorkar school dang masü saka nija school tem dak-a tenük yoka ketdangsüa repranger saka parnoki iba mapa akangakanga inyakba majiteter aser nija school tem pei sünütsü dang südaktsüba angur. Anungji NSF-i anir kaketshir teloktem aser ano kaketshir tsüraburtemi ola adoka sorkar rongshitsü mapang ka tongogo ta bilemer. Nagaland nung sorkar school tem jenjang tajungba akümtsü atema sorkar aser department-i merangba osangtembo angazüker saka tang tashi sorkar school tem teküpok jenjang nung dang lir, iba jagi tanur tajung kümdaktsünüdang, tsüraburtemi timtemaka, pei ang machi-majem aremdi ta ser pei chirnurtem nija school nung züngdaktsür. Ajisüaka nija school tem iba amai dang odaktsüra kobi melii nija school nung takataitertem dang züngtettsüsa tensa ka ajurutsü akok. Anungji, Nagaland sorkar dang nija school tem tiptema ayutsü aser tenük yoka reprangtsü asoshi mera kar agiang ta rongshiba ola kar adok nung jungdisü ta bilemer.

OLEMSABANG

AO KIN TATOK MESHIBA, ASER SOBALIBA

~ P. Renthly Jamir

Tawa Mokokchung nung Ao kin tatok meshiba result, aser Aor temi Sobaliba asentenshiba. Iba ya onük ana küma lemdanger tatsütiba nung ni angatetba aser tatalokba agi sayuba lemsateper.

Mezüngbuba nung Ao Kin lumiba aser Tsüngrem telangzüba, Aor Sobaliba nung mapang shia yimkong Tsungrem Ak tayi tuluba Boro tatettsü mali tobur tajung ka agi külemer. Iba ya yimdak achiasünga tsüksüngonsung asutsü temoatsü meshiba arür tsukchir akoktsü yimdak wara shira kecha malitsü atema putirtemi taküm aser kibong asüngteta külemer. Yamaji külemdang putir memeshiteti lira yimdak kati ka majinütep mepet mesüa lira, iba külembaji yimkong tsüngremi magizüksü.

Aser paonungjisa yipru tulu aita kio jen ajak raksaja süngdonglidong ajak Kusatsütsü. Aji dang masü kümpiyong yim temoatsü malitsü yimren maka arür makoktsü wara shira tepoktsü. Alemli süng lung Külemdangjibo yutsür tanüa Khristmas kibur kiyir benjong kibur par yim Süngkümshi tashi nung lepku tangokra menamiya atakatam ta züngshia atetaponga shitak ataloka arur. Anungji aji mataloktsü mapang talangka nungi meshiteta asüngteta ochishia sarasadema atar.

Ao kin tatok meshiba - Asenok nokyü majung tamakok anguba ajak nung Tsüngremi agizükogo tatok agütsüogo pai langzüogo ta masütsüla, Tang ya Ao kin tamanger tamakok maaksü tulu Tsüngremi jungkai adoktsüogo aser iba tai ya kong nungi shiba ajanga ta Tsüngrem dang asüngdangtsüla, Aor dang masü kishikinar dena mangyimtsü kibong paika tetsü mali kümdaktsüba khenyongi Aor tenüng tajung pongu menentokbaji Tsungremi Aor tamanger dang tangatettsü Pa terasaba ka sayur to metetdi. Israel nunger kodang Ai yimti nung tamakok angu nai onok sarasadem langzüogo ta mekazü. Yihusuai süoshi shisa tamburtemi tokolak nung auyi palok aser ya shiba tai ta tera tashi lua bushitep. Davidi tai menabayong tai makar nisung meyi neter tepset. Tanüa Aor tamanger tokolakbai anir tashi tali amshia tangar mapang, jembiba, inyakba, zuluba lemtetba, Renemba ajak tamakitsü (Null and void) ta kümtsür aibelener ajak kasetdang Shoot The Shit ta Robert Clive policy amshia tashi mangar kar lira amokmerena tangsa tatok menangzükra ta taten tsübudakja keyi kangla molusongzü kangla nung puoktsü ta inyakba lira ano lokti inti tayimtenba pa kangki nung angenlokang ta Aor tamanger tsüngda lenchi-i marutepe tatok magütsüteti lira tang dang ya tuluba Tsüngrem terasaba arutsu Angken yagi sayur. Arogoji tai atokba ano tai atokba lokti ka ta Spenceri ashir. The Church should be the society of forgiven and forgiven. Tanu ya mangyimba tamakok anogo, kechiyong Tsungremi asenok Sarasademba lumiba langzüa tai atok asübo shinga hangsü agia marangtsü kechiyong pai tajung nung kodanga tamajung mebendenloktsür. Ango meshi nung per magütsür. Yisuiibo nai medemer dang tai tokang aser ne dang tai atoktsü ta ashiba ang angur. Tang Ao kin Mokokchung nung tatok meshiba Sentong ya ajanga Tsungremi Ao kin nem ongko ka inyaktsü agütsür. Aser iba ongkoji ochishitepa inyaktsüla. Aor tamanger tokolaktemi anir kari kar anema azü jangraba lira aji anentsüla. Pa kangki nung angenlokang ta ayimtenba lira aji anentsüla ta Angken tatalokba yagi kuli asür. Aji mesüra tanga-a Sungdongzüngdang Pu ataloka lir ta bilemer. Obula nunger-a yimtak Alushijak mali nunga kitsük kirung tena yim temoatsü malir ta jembia aru.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

BillyGraham indang taila video aika online nung proker: Pastor Joshua



Rev. Billy Graham

February 11, 2026: Artificial Intelligence (AI) ajanga yangluba Billy Graham indang taila video aika online nung prokdar, ta pastor kati tekümdangtsü metetdaksü.

Pastor aser kaketzülur, Joshua Pauling-i, nüngtugu sayutsüngir, asür Billy Graham indang AI deepfakes aika online nung angur, aser iba ya ajanga tereprangertemi koba shidak mesüra koba taila ta ratamatar, ta metetdaksü.

Arogo nung züngsem kati pastor Joshua Pauling den video link ka lemsatep, aser ibaji Billy Graham-i sayutsüngiba video ka liasü; atangji nungbo iba video ji AI indang video liasü.

Pastor Pauling ya Charlotte nung aliba All Saints Lutheran Church nung vicar lir aser 'Education's End' kaket zülusang lir.

Yaküm Billy Graham Evangelistic Association (BGEA)-ia YouTube nung Billy Graham indang taila video aika lir, ta tekümdangtsü sangdonga liasü.

BGEA-i nüburtem dang Billy Graham-i sayutsüngiba shidakba video reprangtsü atema BGEA indang official channels nung ang reprangang, ta metetdaksü.

Pastor Pauling-i, "Olasüji Graham indang ola kürak, ajisüaka langka meshidak ama reprangteter. Ni Graham-i sayutsüngiba video aika angashidangogo, ajisüaka iba video jibo pai sayutsüngiba indang masü," ta metetdaksü.

Video nungji Graham-i 2016 küm Vatican sangdong ka indang shia lir, ajisüaka 2016 küm tashi nungbo Graham-i sayutsüngiba nungi anisüngzüker liasü, anungji iba video ji taila video lir ta Pastor Pauling-i metet.

Ajisüaka tesasatsüka nisung meyirjang aikati iba video ji Graham-i sayutsüngiba shidakba video lir ta amanger, ta paisa metetdaksü.

"Video tsünglanglen karibo iba video ashishir asü masüar metettsü atema ni 'comments'

züngdanga liasü. Iba YouTube channel 'Faith in Action' nungji Billy Graham 'recordings' aika liasü. Ajungaji taila asü? Iba channel nung aliba ajakji AI ajanga yangluba asü? Ano külen aikati Graham-i sayutsüngibaji tenüngsanga lir! Parnoki iba video nungji tashishitsü kecha mereprangtet asü? Aikati comments agüja lir aser YouTube channel-i 'Tsüngremi na moajang' ta langzüa lir," ta Pauling-i metetdaksü.

AI video quality ya tajungba dang akümer, anungji koba shidak mesüra koba tailaar metettsüji tamakoktsü, ta Pauling-i metetdaksü.

"Ajungaji artificial intelligence ajanga yangluba lir, iba tashioktsüba ajanga tamang akaba, ochi aser atangji raksatsütsü," ta Pauling-i metetdaksü.

"Kü dangi iba link yoksang Arogo züngsemji

bilemdangang, pai iba sayutsüngiba video ji atangji video ta bilema liasü. Ajisüaka ibaji AI ajanga yangluba lir. Arogo nung züngsem sangji dang masü saka hopta ishika tsüngda video ji nisung million tesaadangibo reprangadoker liasü," ta pastor Pauling-i metetdaksü.

"Iba ama tensa ka nung telangzübaji Arogo nungi angutsü, asentenshir adenshia tekülem sentong agitsüla. Tenla kiji taila Yisu masü saka atangji Yisu indang sayuba tesem ka asütsü," ta pai metetdaksü.

"Küm 2,000 dak tali Arogo nung tamangertem longjema Yisu Khristai sayuba taküm O angar, Khrista agizüker aser Khrista temang nung züngsemtem longjemer lemsateper," ta pai metetdaksü.

"Arogo ajanga nisung ka Khrista den sendakteptsür," ta paisa shisem.

conversion özüng benoka aliba state 12 ji Rajasthan, Uttar Pradesh, Odisha, Chhattisgarh, Arunachal Pradesh, Gujarat, Jharkhand, Uttarakhand, Haryana, Madhya Pradesh, Karnataka aser Himachal Pradesh lir.

Putirtemi, item özüng ya aiben tim mesüi amshir aser tai maket nisung aika nem tiyazü nung tai tonglokja tepuokdak ayur, ta metetdaksü.

Item özüng kübok tepuokdak ayur, senchi achir aser state kar nungbo taküm piyong tepuokdak ayutsü özüng lateta lir.

CBCI otongdar, putir Robinson Rodrigues-i, "Tesüiba küm ishika tsüngda 'kangshia tamangba yimsü meyipdaksür' ta tiyazü nung tai tongloksüba ken o noklang aika lir, aser kuli maliba agi item ken o aika shibangogo," ta metetdaksü.

ANOGO ABEN TSÜNGREM DEN

Tepela aluruwa

"Anepdang ne metsüji prokang, aser nikongdang neka sota teyu" (Sayu. 11 :6).

Sayutsüngiyimji alu ayimba den medemdanger. Metsü prokertemji shirnoki nisungtem den ajurutepa Khrista indang lemsateper parnokji lir. Shibai mapang tajung dang ataa lidir pai/lai metsüa meproksü aser aluruba-a malitsü. "Shibai tsüngsang 'ajung atadir pai meproksü; aser shibai mepetji repranga lidir pai alu marutsü" (Sayu. 11: 1-6). Laishiba özüngji "Mapang nung aser mapang masüdang oji sayuang" (2 tim. 4:2). Nai akok tashi osangtajungji tangar den lemsatepang. "Shirnoki kurua proker parnoki kurua arutsü, shirnoki menungnangi proker parnoki jenti arutsü" (2 Kor. 9:6).

Mapang tajung tera angubaji tila tekümdaksü. Kodang jepi metsü tila ali nung prok, ibaji tulu küma iner iba akhüm nung ozü sangnu aser shirurutem animesüngzükama? (Mt. 13:31,32). Kodang kija taküm ka Khristai ani telok tulu pa dangi marukama ? Andria Peter Yisu dangi anir aru (Yn. 1:41,42). Aika taküm asoshi Peter koda amshi asenoki metet. (T.Mapa. 2:41; 4:4).

Asenoki tanelatem anir arunera asen jangrabatem tenlatsüla. Aluyimertem anepdang ali onsaba nung mapang tenlar, metsü proker aser tzü ainer, ayi atsüdoker aser ali temo agütsür. Tzü maneni meinra metsü prokbaji amajok. Khrista dangi arurtemji maneni Tsüngrem o agi mesütsüla. Inyakertem mejangja alidang tsükchiri metsü tamajung proker (Mt. 13:24,25). Satani osangtajung den tiyazü agütsür aser atsünga odaktsür. Tanela anir arur ka pa / la taküm renema aliba jagi metetdaksütsüla.

India nung putirtemi anti-conversion özüng agientsü akhanger

February 11, 2026: Anti conversion özüng ya linük temzüng kübok tamangba yimsü temeden anema lir, anungji tang state 12 nung aliba anti-conversion özüng ajak ya agienadoktsüla, ta linük nung Khristan putirtemi takhangba agütsü.

Catholic Bishops' Conference of India (CBCI) senden February 4 nungi February 10 tashi Bengaluru nung ayongzüka agi, aser iba senden tatembangbuba anogo nung putirtemi anti conversion özüng agientsü takhangba agütsü.

February 10 nü CBCI-i sangdong ka ajanga, "India linük temzüng ajanga senso ajak nem tamangba yimsü temeden agütsür, pei yimsü benshitsü aser pei yimsü tangar den-a lemsateptsü atema temeden agüja lir," ta metetdaksü.

Tang India nung anti

conversion özüng benoka aliba state 12 ji Rajasthan, Uttar Pradesh, Odisha, Chhattisgarh, Arunachal Pradesh, Gujarat, Jharkhand, Uttarakhand, Haryana, Madhya Pradesh, Karnataka aser Himachal Pradesh lir.

Putirtemi, item özüng ya aiben tim mesüi amshir aser tai maket nisung aika nem tiyazü nung tai tonglokja tepuokdak ayur, ta metetdaksü.

Item özüng kübok tepuokdak ayur, senchi achir aser state kar nungbo taküm piyong tepuokdak ayutsü özüng lateta lir.

CBCI otongdar, putir Robinson Rodrigues-i, "Tesüiba küm ishika tsüngda 'kangshia tamangba yimsü meyipdaksür' ta tiyazü nung tai tongloksüba ken o noklang aika lir, aser kuli maliba agi item ken o aika shibangogo," ta metetdaksü.

February 11, 2026 nü anema-a inyaker, ta osangbener den jembidang Robinson Rodrigues-i, Anti conversion özüng "Kangshia yimsü meyipdaksü ta tiyazü nung Khristantem nem tai tongloksüba ken otem nung aitsüba shilemji tazüngla, ajisüaka tepuokdak ayuba densema parnoki tebang agi meshitetba timtem aika ajangshir," ta metetdaksü.

Khristan yimsü prokba nokdangtsü nükjidong nung Hindu yimsü alia amangertemi Khristan missionary mapatem anema nokdaker.

India tesem balala nung Tenla kitem mita aoer, tekülem senong tagidak mapang nung Muslims aser Dalit timtem agütsür aser police nem osang tai agüja pudaktsür.

Rodrigues-i, anti conversion özüngtem ya Khristantem anema inyaktsü atema amshir, iba ama tesempatsü mapa yagi lendong tulu ataloktsü jenjang ka tongogo aser Catholic nun tem

metetdaksü.

anema Supreme Court nung ken o aika benoka lir.

National Council of Churches in India-i benokba ken o ka dak sendakba nung February 02, 2026 nü Supreme Court-i Centre sorkar aser state 12 dang telangzüba agüjang, ta tuyuogo.

Ano tanga temepishiba ka nung CBCI-i sorkar dang Dalit Khristantem bendangshidanga züngshiba anentsüla, ta takhangba agütsü.

Tang India nung Dalit Muslims aser Dalit Khristantem nembo shisaliok rejutem aser sorkar mapa nung menden shiteta meyutsür.

Tang India nung Khristan nütsüng shilem 60 bo Dalit mesüra tribal Khristantem lir.

India nung nütsüng shilem 2.3 dang Khristantem lir.

AO OSHI ANGAZÜKDAK:**TANÜ ANGAZÜKTSÜBA OJANG****Tzünari**

(n) ayong nung tzü perepa ayimdak tesem (eddy)

* Ayong tzünari alidak kanga kümdanga ajanngtsüla.

Tzünglu

(n) anünglen nungi tsükba tzü (rain)

* Tzünglu kanga aruba agi ayong nung tzümetsünger.



Tir Yimyim

OLONG PAITEP # 7412

1						2				3
								4		
5		6				7				
8										9
								10		
				11		12				
		13								
14						15				
				16						

TIPLÉN

- Ojembitsü tashi - 8
- Süngjang tapu ka - 5
- Tekanük nung enokba - 5
- Teka amtep - 5
- Tzük asendak - 5
- Tsünpang tema aliba - 5
- Ken atenba yimya - 5
- Asangur - 8

LANGTSÜNGLEN

- Tepok telung nung shilem ka - 7
- Tamajung aküm - 5
- Chi den külemi achiba - 3
- Meimchir alimai aruba - 3
- Laishiba nung ayong ka - 4
- Tarutsü nükla - 7
- Tamendakdak/Nükjiong - 4
- Tenük-telen mejungi aküm - 5
- Terok nungi adokba - 3
- Meimchir telemsa - 3

OLONG PAITEP # 7411 TELANGZÜBA**TIPLÉN :**

- Taa, 3. Teküm, 6. Aibelen, 7. Aut,
- Ajizük, 10. Ojala, 11. Semer,
- Sen, 15. Kioktsü, 17. Itsük,
- Kar.

LANGTSÜNGLEN :

- Tai, 2. Asensor, 3. Tanü, 4. Kua,
- Mitsüktsü, 6. Azübenshi, 8. Lah,
- Jangkok, 12. Akok, 14. Nashi,
- Sür.

NAI-A YA METETTER

February 10, 2026 nü Chhattisgarh kübok district balala nung lokti kiyimba sentongtem agiogo aser iba ajanga alima otsü tasen ka yanglua Golden Book of World Records nung zülüokogo.

Chhattisgarh state sorkari Mukhyamantri Kanya Vivah Yojana kübok iba lokti kiyimba sentong ayongzüka agi aser Chief Minister Vishnu Deo Sai-ia Science College Ground nung apuani 1,316 tashi moatsüogo.

Iba scheme kübok apuani shia nem state sorkari Rs 35,000 senotsü teyari agüja liasü.

Arunachal CM-i Taksing nung Buddhist monastery lapoktsü

Itanagar, February 11, 2026

(Agencies): Arunachal Pradesh Chief Minister Pema Khandu-i February 10, 2026 nü meta talang pilar Taksing nung Buddhist monastery ka lapoktsüogo.

Taksing ya Upper Subansiri district kübok lir aser CM

Khandu-isa Aka Tulku Tsering Chaijee Rinpoche-i Abbot (Khenpo) akümba sentong nung aden.

"Taksing ya tanülaeren senmang aliba tesem ka lir aser tang lapokba gonpa ajanga tarutsü pututem asoshi tamangba yimsü len aniba centre ka

akümtsü imlar" ta Khandu-i ashi.

Iba monastery ajanga nisungtem anitetsü imlar. Aka Tulku Tsering Chaijee Rinpoche La indang sentong nung adenba atema kanga pelar aser nisung ajak asoshi yimjung, teputep aser anema alitsü temoatsü meshir ta paisa metetdaksü.

SC-i tuyuba ama Tripura nung kibur maliba shirurutem azüoker

Agartala, February 11, 2026

(Agencies): Supreme Court-i tetuyuba agütsüba nung ajemdaker Tripura sorkari kibur maliba azü aser shirurutem azüoktsü mapa tenzükogo.

Iba maparen nung sorkari public safety aser disease prevention asoshi tongtipangtiba bilema inyaker.

Animal Birth Control (ABC) Rules, 2023 kübok kibur maliba azütem dak mandatory sterilisation aser vaccination asür ta ketdangsürtemi ashi.

State sorkari municipal bodies ajanga Animal Birth Control centres aser shelters lapoktsü tenzükogo aser iba ya Animal Resources Development Department den amalitepa inyaker ta ketdangsürtemisa ashi.

"Mapang talangka atema

shirurutem azüoktsü infrastructure ulushir. Agartala Municipal Corporation ajanga Hapania nung Animal Birth Control centre ka lapokogo aser R.K. Nagar nunga animal shelter ka lapoka lir" ta Animal Resources Development Secretary Deepa D. Nair-i ashi.

Tripura sorkarisa national highways nung kibur maliba shirurutem ajanga lendong atalokba nungi nübortem kümzüka ayutsü asoshi round-the-clock surveillance aser rapid response systems tenzükogo.

Iba mapa ya National Highways and Infrastructure Development Corporation Limited, Public Works Department, Transport Department, municipal

authorities aser district administrations yaritepa inyaker.

Highways nung anguba shirurutem shelters aser cowsheds-i anir aoer aser chiyungtsü, tzü aser veterinary care agütsür.

"State nung mozü ki ajak nung anti-rabies vaccines aser immunoglobulin peria dang yua lir. Shisaliok rejutem nung kibur maliba shiruru indang yimya, tashidak aser jenbua alitsü indang awareness programmes agir" ta Animal Resources Development Department Dr Neeraj Kumar Chanchal-ia ashi.

Tripura nung tang Devipur, Mohanpur aser Dharmanagar nung cow shelters lapoka lir. Ano tanga district tem nung cow shelters pungu lapoktsü sentong lir.

Manipur CM-i Imphal nungi SpiceJet direct flights tenzüktsü

Imphal, February 11, 2026

(Agencies): Manipur Chief Minister Yumnam Khemchand Singh-i Imphal den Guwahati, Kolkata aser Mumbai tashi direct flight services tenzüktsüogo.

Bir Tikendrajit International Airport, Imphal nung CM Yumnam-i SpiceJet indang tayimtsütem lapoktsü. Iba sentong nung MLA tem, tongti ketdangsürtem aser airport ketdangpurtem aden.

"Prime Minister Narendra Modi indang Viksit Bharat mangdang asoshi tenüngsang

agütsür. Viksit Manipur nükjiong atongtsü atema connectivity ya kanga tongtipang lir. Tanü tensa ajanga air travel ya kanga temulung lemtetba transport kümogo" ta Chief Minister-i ashi.

SpiceJet-i mapang shia airfare structures meyipa repringhsitsü aser common public-i senzütetsüsa jenjang latettsü mepishir ta Yumnam Khemchand Singh-i passenger welfare atema bilemja metetdaksü.

Iba sentong nung shilem ka ama CM Yumnam-i Guwahati

tashi aoba SpiceJet flight nung mezüngbuba passenger nem boarding pass agütsü.

Iba sentong nung Lok Sabha MP Dr Bimol Akoijam, Thanga Assembly Constituency MLA Tongbram Robindro Singh, Chingai Assembly Constituency MLA Khashim Vashum, Additional Chief Secretary Anurag Bajpai, Transport Director Khumanthem Diana, Superintendent of Police (Imphal West) Ksh Shivakanta Singh aser Airports Authority of India tongti ketdangsürtem aden.

Asenok tezüngzüktep ka yanglutsüla, mesüra US-i langka tesashi inaktsü: Trump



Washington, Tsüklai/February 11 (Agencies): Tangatettep kati arutsü asoshi jembishinüba nung tamakok ajurura Washington-i Iran amaktsü akok ta US Tir Donald Trump jembishinü yimya agi sayur aser kasa mapang Tehran-i agreement ka yanglutsü mulunga lir ta lephsia ashi.

Washington aser Tehran tsüngta region nungi tetsüngtai ia yaritepa jembishinü akaba mapang Trump-i iba o ya jembizüka yok.

Osangbener den jembidang Trump-i region nung tzüyim sepai tuluba akumba indang rateta ashi aser sepaitem renema lir ta ashi.

"Tang Iran leni flotilla kanga tuluka aoba nenoki meteta lir. Kechi atalokdir repranga

atatsü," ta pai ashi.

"Parnoki tezüngzüktep ka yangluner ama nibo bilemer. Parnoki aji meyanglura parnok tamachi asütsü. Taoba mapang asenoko par indang nuclear tashi raksatsü, aser tanga ano tali raksatsütsü asü masü ta reprangtsüsa akumtsü."

Tang aliba Iran lenir den tezüngzüktep yanglutetra, ibaji mapang talangka alitsü asü, ta Trump dang asüngdang dang pai kumdanga langzü.

"Ni memetet. Ni meteta alibaji, parnoki tezüngzüktep ka yangluner. Parnoki shinga dena mejembitsü, saka parnoki küden jembir," ta pai ashi.

"Tezüngzüktep tajung asütsü. Nuclear noknü mali, missiles mali, ya mali, ajia mali, nai aginüba ama ajak balala asütsü," ta Trump-i langzü.

US-i taoba mapang Tehran den tesendaktep yanglua aliba Trump-i aija taoba mapang nuclear accord ya tamachitiba tezüngzüktep ka alitsü ta ashi aser Iran lenirtem ochishia meinyaker ta tai tonglochtsü.

Trump-i US aircraft carrier tanabuba West Asia leni yoktsü asadangtar ta Israel indang Channel 12 aser Axios dang ashi.

"Asenok tezüngzüktep yanglutsüla, mesüra asenoki langa tesashi inyaktsüsa akumtsü," ta Trump-i tekumdangtsü ashi.

Washington-i sepai tali yoksemtü asadangba mapang Iran mitkar lenirtemi tashi manger.

Iran litsü-lika anema timtem agütsüba nung tashi tuluba aser tesashiba nung telangzüba agütsütsü, ta par armed forces-i nangzüka lir.

Iran indang Supreme Leader Ayatollah Ali Khamenei-ia nüburtem dang lungjema alitsü ayongzü.

Iran lenirtemi par indang missile arsenal ya khenyongi jembitsü makokba ken o lir ta ashir aser nuclear atsüanem akatsüba den sako senotsü tenokdangba agüja aliba agentsüla ta ashir.

Canadian high school nung nisung ter khaset

Vancouver, TSüklai/February 11 (Agencies): Mongulbarnü Canada anüolen high school ka nung nisung kati injang khaloktsüba sülen iba lendong agütsür densema nisung ter asü.

Anasa United States nung iba ama lendong ya mapang shia ajurur, aser Canada nunga kasa timtem ajuru, aser injang akhar ya tetsür lir ta police-i ashi.

British Columbia nung aliba Tumbler Ridge jila kübok high school ka telung nung nisung trok tasü ngutet, nisung ana iba lendong atalokba den sendaktepa lir südi ta bilemba ki ka nung tasü angu aser ka mozü kidangi aodang lenmang tom nung asü, ta Royal Canadian Mounted Police-i ashi.

Nisung ana kanga sashia yirua mozü kidang lir aser nisung 25 yirur aliba anepaluogo, ta police-i ashi.

Police-i asürtem kwi tanur liasüar mashi.

Iba lendong agütsür südi ta temulung melemi bilemba nisung ka pei sasa yiruba agi asü ama ngutet, aser temulung melemettsüsa nisung mali mesüra nüburtem asoshi timtem mali südi ta amanger, ta ashi.

"Taonung ama tensa nung kechi ashitsüar temulungi marur. Iba amala ya kidang anasa masü saka danga tesemtem nung atalok ama bilemer," ta British Columbia Premier David Eby-i ashi.

Police temi iba lendong agütsür indang osang tejangja kecha mashi saka nisungba ya tetsür ka lir ta ashi.

Police active shooter alert ka ajanga temulung melemi aliba ya tetsür ka aser kou temoro ta shia liasü. Police Superintendent Ken Floyd-i mapang tatsüka lir osangbener den jembidang, temulung melemi aliba nisung ya alert nung ashiba kasa nisung school telung nung sür aliba ngutetba ya lir, ta shia liasü.

United States dang nungi Canada nung prangbong ozüng tesashiba, ajisüaka Canada nungeri license den prangbong amshitettsü akok.

Trudeau sorkari 2020 nungi handgun aser assault-style weapons amshiba nung tenokdangba jenti agüja lir, koba Nova Scotia aser Uvalde school, Texas nung nisung aika khasetba mechi ozüng ya yanglu.

Ajisüaka aluyimer aser shikarir temi anema nokdakba sülen rifles aser shotguns tabu kar menokdangteti yutsü.

Tumbler Ridge ya British Columbia north tsütsü Rocky Mountains tenemtsünglen lir, kong nisung 2,400 shi alir aser Vancouver northeast tsütsü kilometer 1,155 shi pilar lir.

Tumbler Ridge Secondary School nungya kaketshir 160 lir aser parnok ya arishi küm 12 nungi 18 tsüngta lir ta parnok website ajanga ashir.

Canada Ato Kilonser Mark Carney-i Halifax nung Defence Industrial Strategy tasen ka Bodhbarnü sangdongtsü aliba aser iba sülen Munich Security Conference atema Germany-i aotsü aliba thinenogo, ta odongtar kati ashi.

Albania nung sorkar anema longkak aiter 13 apu

Tirana, Tsüklai/February 11 (Agencies): Albania yimtiba Tirana nung longkak aitertemi Ato Kilonser mapang nungi anentsütsü khanga PM Edi Rama office kima longkak aitba mapang police temi parnok dak tzü aser tear gas khalokja liasü. Ochi mashi inyakyim dak sendakba nung longkak aitertemi pa mapang nungi anentsü akhanger.

Longkak aitertemi Mongolbar aonung police dak Molotov cocktail aser flare tem mereploktsü, shirnoki meyiper lokti dak tzü aser tear gas khalokja liasü. Ano Albania indang parliament ki anasa-a longkak aitertem aser police tem tsüngda mangatettep adoka liasü, ta media sangdong balala ajanga metetdaksü.

Lendong nung nisung 16 yirua mozükidangi yok aser nisung 13 pua liasü. Ajisüaka

yirurtem rongnung longkak aiter kwi mesüra police kwi dena ali iba indang osang tejangja memetet.

Albania nung ita ishika tsüngda sorkar anema nüburtemi aiben longkak aita arudar.

November ita nungi nüburtemi sorkar dak temulung masüba tali küma odar. Prosecutor temi Deputy Prime Minister Belinda Balluku, shiba Albania indang minister for energy and infrastructure lir, lai sorkar construction contract tem alizükba nung minprong ta ashiba sülen nüburtem rongmesoa liasü.

La ya mapang tatsüka atema office nungi suspend sütsü, saka ita ka dang lir Ato Kilonser Rama-i mepeshiba sülen mapa nung anioka liasü.

Longkak aitertemi ashiba agi, parnoki Rama aser

Balluku naprongla mapa nungi anendaktsüner. Parnokisa parliament dang Balluku indang immunity agintsütsü takhangba agütsüogo, ajita asü nungdang la obendangtettsü.

Mongolbarnü longkak aitba azüoktsü atema police 1,300 dak tema yok, koba Tirana nung azütokshia longkak aitba sülen hopta ana dang lir ataloka liasü.

Longkak aitba sentong anaprongla ya opposition Democratic Party lenir aser taoba mapang Ato Kilonser Sali Berisha-i ayongzüka liasü.

Pai Mongolbarnü ashiba agi, longkak aitba ya Albania nung yimjung nung nüburtem nokdak tenzüka temaitsü lir, ta Associated Press (AP) news agency-i ashi.

Berisha ya-a taoba mapang ochi mashi inyakyim atema aitsür lir.



Kabul, Feb. 11 : Health worker kati Kabul, Afghanistan nung tanur ka nem polio jemdaktsüdang tangokba noksa nung angur. Afghanistan nung arishi küm pongu tekübok tanur million 7.3 dak tema poliovirus nungi kümzüka ayutsü nükjidong nung mezügbuba polio vaccination campaign ya Hombarnü tenzü.

Gezani yipru agi Madagascar nung kongshi: Nisung 9 asü

Antananarivo, Tsüklai/February 11 (Agencies): Tropical cyclone Gezani-i Madagascar anütoklen tzüküm nung kongshiba sülen iba Indian Ocean nung aliba asetkong nung yimti tulutiba rongnung tanabuba nung nisung teku süogo aser mopung aser tzünglu agi teraksatsüba tulu bener arutsüogo, ta ketdangsürtemi Bodhbarnü metetdaksü.

Madagascar indang disaster management office-i ashiba agi, yipru lendong nung nisung 19 yiru aser Gezani yipru agi tzüküm nung aliba lokti dak kongshiba sülen kümdangshia atatsü atema tzüküm nung aliba Toamasina yimti temeket nung district ka nungi nisung 1,500 anina liasü.

Toamasina nung aser temeket nung alirtemi cyclone agi nisung aliba tesem kanga mejungi kongshiba indang lemsatepa liasü. "Ni iba amai mopung tesashi aonba kodanga majangshidang. Kishi aser kichiba merang agi yanglur liasü, saka kanga mejungi anokshitsü," ta Harimanga Ranaivo-i ashi.

Fytia yipur agi iba asetkong kongshia nisung 14 tepsetba den nisung 31,000 dak tema pei talidak ki toktsür jenshia aotsüsa akümba sülen anogo 10 tsüngda yipru tanabuba agi Madagascar dak kongshiogo.

Yipur kanga sashia aitba mapang mopung 185 km (115 miles) per hour shi nung aon aser gusts ji 270 km per hour shi liasü, koba kilem nungi injung aser süngtong tulu rakteta bener aotsüsa tashi tulu liasü.

Yipru agi asetkong mekongshi tsüngda ketdangsürtemi school tem shibangtsü aser nüburtem jenokdaktsütsü atema tejenokdak renemja liasü.

Madagascar indang National Bureau for Risk and Disaster Management-i taoba mapang Toamasina nung tzüyim nungi tzü mogshia ayimba ajanga yimtungtem metsüngdar ta tekümdangtsü metetdaksür liasü.

Madagascar meteorological service-i ashiba agi, Bodhbarnü tashi nungbo Gezani yipru tashimeiti aküm aser linük yimtiba Antananarivo leni ogo.

U-13 ASMITA Football League tembangogo



Dimapur, Tsüklai/February 11 (TYO): U-13 ASMITA Football League 2025-26 (Major League - East Zone) shibangba sentong February 10 nü Chümoukedima Football Stadium nung takok ngua agiogo.

Iba asayamung ya ASMITA aser Khelo India inyakyim kübok grassroots football asayamung ka lir.

Asayamung shibangba sentong nung Secretary of Youth Resources & Sports Government of Nagaland Anthony Nnullie, IAS tongti

tejaoker liasü. Sentong nung o jembiba mapang Anthony-i, lanur asayartem aser talisa tetsürtem nem tashi agütsütsü atema Khelo India kübok ASMITA amala inyakyim ya kanga tongtibang lir, ta ashi.

Paisa, asayamung nung shilem agirtem dang taküm libaliro azüoka bendanga agüja aser pei sasa dak temulung lemteta asayatsü ajungshiba den, tekübokba jenjang nungi asaya terelok asoshi state sorkar bendanga agütsür aliba nenshia metetdaksü.

Kasa anogo asaya 10buba

asaya aser sempet lemtsüba sülen sentong tembanga liasü. Iba asayamung nungi Major League - East Zone nungi Assam aser Mizoram na qualify süogo.

Iba sentong ya Imlisunep, Joint Secretary, Nagaland Football Association (NFA) lenisüba nung agi aser Rengma Baptist Church, Sovima Youth Pastor Awa Lorin-i sarasadema liasü. Maneni sentong nung Chemkula Khiungra-i ken ka aten aser Vice President, NFA Mevisanger Lemtur-i tepela o jembiba liasü.

T20 WC: Super over ana asayaba sülen SA-i Afghanistan akok

Tsüklai/February 11, 2026 (Agencies): Bodhbarnü Ahmedabad nung tang asaya aliba T20 World Cup nung South Africa aser Afghanistan na mamatetteüsa asaya ka asayaago. Team ana tsüngda super overs ana asaya liasü.

Mezüngbuba super over tie asüba sülen tanabuba super over nung David Miller-i ball pezü nung run 16 yanglua South Africa-i run 23 yangluba nung teyari agütsü, koba Afghanistan-i run pezü agi memenepi liasü.

Asaya nung South Africa-i asayar 6 out sür run 187 yanglu. Parnok rongnungi Quinton de Kock aser Ryan Rickelton nati half century kaka yanglu, saka Rahmanullah Gurbaz-i ball 42 nung run 84 yangluba den Azmatullah Omarzai aser Rashid Khan nati run 22 aser 20 yangluba sülen Afghanistan-i SA-i yanglur aliba run menep.

Tatembangbuba over nung asaya akoktsü atema run 13 nüngdaka asayaba mapang Kagiso Rabada-i no?ball ana aonba ajanga Afghanistan nem teyari agütsü. Ajisüaka ball asem nung run ana nüngdaka aliba mapang Fazalhaq Farooqi run tanabuba agiba mapang run out asü aser super over asayatsüsa aküm.

Mezüngbuba super over nung Afghanistan-i run 17 yangluba South Africa-i menepa kasasa nung tembang, saka tanabuba super over bo

SA-i koka liasü.

Tebur T20 international nung tang agi tasembenbuba super over ka dak tali asayaago. 2024 küm January ita India-i super over ana asayaba sülen Afghanistan akok aser taoba küm June ita Netherlands-ia super over ana asayaba sülen Nepal akok.

Mezüng batting amenba sülen South Africa opener De Kock-i ball 34 nung half century yanglu aser Rickelton-ia ball 23 nung half-century yanglu. Iba sülen Rashid-i tenaprongla over ka nung out sütsü.

Asaya akoktsü atema run 188 arishiba mapang Afghanistan team-i asayar ka danga out mesüi run 50 yanglu, saka over pongububa nung Lungi Ngidi-i Ibrahim Zadran aser Gulbadin Naib na out sütsü.

Ajisüaka Rahmanullah-i kanga junga asaya-a ball 26 nung dang half century yanglu aser pa out asüba mapang tashi nung ball 45 nungi run 67 dang nüngdaka liasü.

Asaya tatemi Noor Ahmad-i ball teku nung run 15 yangluba sülen tie-breaker asayatsüsa aküm, koba anaben asayaba sülen South Africa-i kokogo.

South Africa taruba asaya kasa tesem nung New Zealand den aser Afghanistan team United Arab Emirates den Delhi nung Hombarnü asayatsü.

Sri Lanka team nung Hasaranga melen Dushan shimogo



Tsüklai/February 11, 2026 (Agencies): Sri Lanka-i tang asaya aliba ICC Men's T20 World Cup 2026 nung yirur alisang Wanindu Hasaranga melena spin-bowling all-rounder Dushan Hemantha shimogo.

Ireland den mezüngbuba asaya nung Hasaranga, shiba Sri Lanka indang bowling attack nung tongtibang asayar ka lir, pa hamstring yiruba sülen tang iba jenjang agiogo.

Iba asaya nung temang manemi liaka Hasaranga-i kanga meranga asaya-a over pezüprongla aon aser run 25 agütsür wicket 3 agia liasü. Ajisüaka Hombarnü MRI scan ka agiba sülen pa tabelen hamstring shisar aliba ngutetogo aser iba ajanga Brehostibarnü Oman den asayatsü aliba atema pa melener shimtsüsa aküm.

ICC-i, Hemantha züngoksemba Event Technical

Committee-i agizükogo, ta metetdaksü.

"ICC Men's T20 World Cup 2026 Event Technical Committee-i Sri Lanka squad nung Wanindu Hasaranga melena Dushan Hemantha shimba agizükogo," ta ICC sangdong ka ajanga metetdaksü. Arishi küm 31 tain asayar shibai Sri Lanka tenüng nungi ODI pongu aser T20 Internationals asem nung asayaago, pai batting aser spin bowling naprongla nung team nem teyari agütsütsü imlar.

Kasa mapang nung ICC-isa, New Zealand team nungi asayar Michael Bracewell Afghanistan den Chennai nung February 8 nü asayatsü lia warm-up agiba mapang yiruba sülen pa melener shimtsü temelaba agütsüogo, ajisüaka NZ puri pa melener sangdonga mali.

Asayamung mapang squad melenshitsü atema Event Technical Committee-i temelaba agütsütsü nüngdaker, kong ICC General Manager Wasim Khan, Gaurav Saxena, Hemang Amin aser taoba mapang South Africa captain Shaun Pollock nungerdensema lir.

Tottenham aser head coach Thomas Frank na pilaogo

Tsüklai/February 11, 2026 (Agencies): Premier League club Tottenham-i sangdong ka ajanga club aser head coach Thomas Frank den pilaba metetdaksüogo.

Tottenham pur tang English top-flight nung jenjang 14buba nung aliba mapang coach mapa nungi anentsüogo.

Frank ya tang asaya aliba season tetenzük nung club nung aden aser pai anir team-i Premier League asaya 25 nungi 7 dang akok. Parnok asaya 8 nung draw asü aser 11 nung tamakok ngua liasü.

"Club-i tebur team Head Coach melentsü atema telemtetba agiogo aser Thomas Frank-i club tanü toksütsü," ta London nung amendaker aliba club yagi Bodhbarnü metetdaksü.

"Thomas ya 2025 küm June ita shim aser longiemer tarutsü atema team yangertsü asoshi pa nem mapang agütsütsü aser pa nongita yaritsü onok mulungteter liasü," ta Spurs-isa shisem.

"Ajisüaka results aser



Thomas Frank

asayaba yimya majungba ajanga Board-i temelenshi bener arutsü nüngdaka kümogo ta bilema iba telemtetba agiogo," ta club sangdong ajangsa metetdaksü.

Club-isa Danish head coach dang ya pai club atema bendanga agüja inyakba atema kanga pelaba lemastepa liasü.

"Club nung inyakba tepeyong Thomas-i masetshi-i bendanga agüja inyakba den club tejakleni anir aotsü atema takokba tashi inyakogo. Pai club asoshi teyari tulu agütsüba atema onoki pa dang kanga pelar aser tarutsü takok nung aotsü imlaja atar," ta kasa sangdong ajangasa metetdaksü.

BILEMDANGANG

"Tamakoker aliba agiang takoker shisangdaksür."